



Iesus conuoque aucuns de ses Apostres, qui laissent leurs rets à poisson, pour estre pescheurs d'hommes.

COMME Iesus cheminoit le long de la mer de Galilée, il vid Simon Pierre, & André son frere, qui iettoient leurs rets en la mer (car ils estoient pescheurs) & leur dit, Suiuez-moy, & ie vous feray pescheurs d'hommes ; lors ils laisserent leurs rets, & le suiurent. Et estant party de là, vid deux autres freres, à sçauoir Iacques & Iean, en vne nacelle avec leur pere Zebedée, qui refaisoient leurs rets, & il les appella, & le suiurent laissant leurs rets & leur pere. Iesus adonc se sentant oppressé de la multitude, fit retirer vne nacelle arriere de terre, & estant assis enseigna le peuple ; & quand il eut cessé, il dit à Pierre, Meinenous en la haute mer, & lasche tes rets pour pescher, & il dit, Nous auons trauaillé toute la nuit, & n'auons rien pris, nonobstant ie lascheray les rets à ta parole ; & cela fait ils enfermerent tant de poissons que les rets rompoient. Parquoy firent signe à leurs compagnons afin de leur ayder, & emplirent les deux nacelles, de sorte qu'elles enfonçoient. Pierre donc voyant ce fait, se ietta aux pieds de Iesus, luy disant ; Retire-toy de moy, car ie suis pecheur. Ils estoient tous saisis de frayeur ; mais Iesus les assura. Lors suiurent Iesus, enseignant & preschant le Royaume de Dieu.

S. Matthieu Chap. 4. S. Marc Chap. 1. S. Iean Chap. 1. S. Luc Chap. 5.